

# PEDRONĒAN A PAIN BUANMIA QUIRICA

Axa bëtsi bëtsi menuax Jesucristomi  
catamëcë unicama Pedronën quirica  
cuënëoxuan

**1** <sup>1</sup>Ëx cana Pedro, aín bana unicama ñuixunuan Jesucristonën caísa 'ain. Mitsun nētēnuax bëtsi bëtsi menu tsóti cuan 'aíshmi Ponto, Galacia, Capadocia, Asia, Bitinia, a nētēcamanu 'icë cana ënë quirica mitsu buánmin. <sup>2</sup>An sinánsabi oquin ainan 'inun ca Nucën Papa Diosan mitsu caísacëxa. Aín Bëru Ñunshin Upitan 'imicëxmi ainanishi 'aish ax quicësabi oi 'inun mitsu 'imianan ca Jesucristo bama cupí mitsun 'uchacama tērēnquin mitsun nuitu upí 'imiäxa. Usaími mitsux Nucën Papa Diosan nuibacëx 'icësamaira oi chuámarua 'aish bucucanti cana cuëënin.

Usai 'itia unin ñuia

<sup>3</sup>Nucën Papa Dios, ax Nucën 'Ibu Jesucristonën Dios 'ianan aín Paparibi, a cananuna rabiti 'ain. An ca nu nuibaquin bamaxbia baísqüia Jesucristo an nun 'uchacama tērēncëxnu bacéntécëncësa 'aish, ainan 'inun nu 'imiäxa, ënë nētēnuax ainan 'aíshnu aín nētēnuribi 'inun. <sup>4</sup>Nucën Papa Diosan ca mitsúxmi aín nētēnu abë 'itioquin mēniócëxa. A nētēnuax ca uisa ñubi, ënë nētēnuax 'icësaari chëquiüanan cēñútima 'icën, anu ca uisa 'uchabi 'aíma 'icën. Usabi ca xëñibua 'aínbi 'iti 'icën. <sup>5</sup>A nētēnu 'iisama pain 'aíshmi ënë

nētēnuaxbi ami catamëtia isquin ca Nucën Papa Diosan aín cushínmi ñu 'atima 'aíma upíshi 'inun mitsu bërüanquin 'aquinia, an mēñfosabi oími Jesucristoa utēcëncëbë aín nētēnu abë tsónun.

<sup>6</sup>Acama sinani camina mitsux uisa ñu cara 'icëbëbi bënëtima cuëënin, ënë menu 'aish tēmëraibi. <sup>7</sup>Ënëx ca ësa 'icën. Asérabi cara curishi 'icë isnuxun ca unin curi tsi rëquirucënu xaroquin tania. Usaribiti camina mitsux caramina ami catamëcë 'ai quixun isnuxun Nucën Papa Diosan tancë 'iti 'ain. Curi 'aíshbi ca cēñúti 'icën. Usa 'aínbi camina tēmëraquinbi Nucën Papa Diosmi catamëquin ëncëma 'aish curisamaira 'iti 'ain. Usauquin tancëxbimi asérabi ami catamëti 'ain ca utēcënquin Jesucristonën —asérabi 'ënan 'aish camina 'ëbë 'aish cuëënti 'ai —quixun mitsu cati 'icën.

<sup>8</sup>A isúnmabi camina mitsun Jesucristo sinanin. Usa 'ain camina a isaxmabi ami sinani chuámarua tani cuëëinra cuëënin, anúnmi uisairai caramina cuëëni quixun nu ñuixunti bana 'aíma 'aínbi. <sup>9</sup>Ami catamëcë cupí ca mitsun 'uchacama tērēncë 'iananmi ainan 'inun Nucën Papa Diosan mitsu iémiäxa.

<sup>10</sup>An Nucën Papa Dios quicë bana uni ñuixuncë unicaman ca —Nucën Papa Diosan ca aín 'uchacama tērēanan uni ainan 'inun iémiti 'icë —quixun cuënëoquinbi uisai quicë cara a bana 'icë

quixun 'unánma 'icën. 'Unáncatsi quiax ñucacanáquin Nucën Papa Diosan bana amiribi amiribi isquinbi ca 'unánma 'icën. <sup>11</sup>Cristo ënë menu ucëma 'aínbi ca aín Bëru Ñunshin Upitan sinánmicë 'ixun, an Nucën Papa Dios quicë bana uni ñuixuncë unicaman 'unáncëxa, tëmërax bamatancëx baísquitançëx ca Cristo aín Papasaribi 'Apu 'aish abë tsóti 'icë quixun. Usaquin 'unánquin ca uisa uni cara Cristo 'iti 'icë quixun 'unántisa tanan únsaran cara uti 'icë quixun 'unántisa tancëxa. <sup>12</sup>Usai Cristo 'itia Nucën Papa Diosan 'unánmicëxun ca atun isquinmabi, atun rëbúnqui 'ixun cananuna nun a ñucama isnuxun 'ai quixun 'unáncëxa. A bana Cristo ñui quicë, a ca a Nucën Papa Diosan naínua xucë aín Bëru Ñunshin Upitan 'amicëxun aín unicaman mitsu ñuixunia. A bana ca ángelcamanribi uisai quicë cara quixun cuaisa tania.

**Jesucristomi catamëcë uníxa  
usai upí 'iti bana**

<sup>13</sup>Usa 'ain camina Jesucristonan 'ixun upí oquin sinani ax quicësabi oi 'iti 'ain. 'Iquin camina Nucën Papa Diosan ca abëmi aín nëtënu 'iti mëníocëxa quixun sinani cuëenquin Jesucristo anun uti nëtë cañti 'ain. <sup>14</sup>Ainan 'ixun ax quicësabi oquinshi ñu 'aquin camina bërâma Jesucristomi catamëquin Nucën Papa Dios 'unáncëma 'ixunmi cuëëan ñucama 'atëcëntima 'ain. <sup>15</sup>Nucën Papa Dios, an mitsu ainan 'inun Jesucristomi sinánmia, ax ca uisa 'uchañumabi 'icën. Usa 'ain camina mitsúnribi añu 'uchabi 'atima 'ain. <sup>16</sup>Ësai ca Nucën Papa Diosan bana cuëñëo quia: “Ëx uisa 'uchañumabi 'aish upíira 'ain camina mitsúxribimi upíira 'inun uisa 'uchabi 'atima 'ain”.

<sup>17</sup>Nucën Papa Diosan ca camabi uni uisa ñu cara 'axa quixun isia. Usa 'ain

camina mitsun —Nucën Papa Dios ax ca 'ën Papa 'icë —quixun sinani aín nëtënu 'inux ënë nëtënu pan 'iquin ñu 'atima 'atimi racuëquin upí ñuishi 'ati 'ain. <sup>18</sup>Mitsun raran Jesucristomi sinánti 'unánma 'aínmi usaribi oquin sinaniabi ca Nucën Papa Diosan ainan 'inun iëmiquin mitsu Jesucristomi sinánmiaxa. Camina 'unanin, curi 'imainun curíqui 'imainun bëtsi ñucama axa cëñúti a cupíbi ca Nucën Papa Diosan mitsu iëmicëma 'icën. <sup>19</sup>Usama ca. Judíos unicaman aín 'ucha cupí uisaíbi 'icëma carnero aín upíira rëmia 'aínbi ca aín imi 'apati Cristo bamacë a cupí mitsun 'ucha tërénquin ainan 'inun Nucën Papa Diosan mitsu iëmiaxa. <sup>20</sup>Cristo ca usai 'iti 'icë quixun ca camabi ñu unioisama pain 'ixunbi Nucën Papa Diosan mëníocëxa. Usaquian mënío 'ain ca aín uti nëtë sënëcëbëishi usai 'inux Cristo ënë menu uacëxa, mitsúxmi ami catamënun. <sup>21</sup>Usa 'ain camina an Jesucristo bamacëbi baísquimitancëxun aín nëtënu abë 'inun 'imicë cupí ami sinanin, Nucën Papa Dios an ca aséabi ax quicësabi oquin mitsu 'imiti 'icë quixun 'unani.

<sup>22</sup>Aín Bëru Ñunshin Upitan 'imicëx Jesucristomi catamëti ax cuëncësabi oi 'iquin axa mitsux 'icësaribiti Jesucristomi catamëcë unicamabë upiti nuibananaxun camina ñu 'atima 'ati ashiquin ëan. Usa 'aish camina béri 'icësamaira oi aséabi cuëenquin upí oquinra sinani atubë nuibananti 'ain. <sup>23</sup>Unishi 'inuan aín titan tuacë 'aish ca uni bamaia. Usa 'aínbi ca axa xëñibua 'aínbi usabi 'iti, aín bana a cuatia Nucën Papa Diosan mitsu bacéntëcëncësa 'imiaxa. <sup>24</sup>Nucën Papa Diosan bana cuëñëo ca ësai quia:

Basix ca upí 'itancëxbi chushia. Ro  
uax ca upíira 'itancëxbi tiriqiu

nětětia. Usaribiti ca camabi uni bamai aín upí nětětia. <sup>25</sup>Usa 'aínbi ca Nucèn 'Ibu Diosan bana xénibua 'aínbi usabi 'ia.

Ènè banax ca —Jesucristomi catamèti ca uni Nucèn Papa Diosnan 'iti 'icè —quixuan aín unicaman mitsu ñuixuncè a 'icèn.

**2** <sup>1</sup>Usa 'ain camina Nucèn Papa Diosnan 'ixun ñu 'atimacama, cèmèti, uni paránti, nutsiti, unibè ñuiananti, acama ènti 'ain. <sup>2</sup>Béři bacéncè tuacèn ca anun caninuxun aín titan xuma 'ati cuèènia. Usaribi oquin camina Nucèn Papa Diosan bana upí oquin 'unánti cuèènti 'ain, ainan 'aish aín cuèècésabi oquin 'ai ami cushicè 'inuxun. <sup>3</sup>Usai 'i camina Nucèn 'Ibu Diosmi sinánquin ax ca asérabi upí 'icè quixun 'unáncè 'aish aín bana 'unánti cuèènti 'ain.

#### **Cristo ami xubu raroti maxáxxa**

<sup>4</sup>Usa 'ain camina axa bamatímoi tsócè, Jesucristo, a sinani ami catamèti 'ain. Judíos unían cuèèncèma 'aishbi ca anun cuèènquin Nucèn Papa Diosan iscèx ax upíira 'icèn. Unían xubu 'aquin maxax upí ami xubu raroti caiscè usaribi ca Jesucristo 'icèn. <sup>5</sup>Usa 'ain camina mitsux a xubumi bucúnrucé maxáxxa 'ain. Jesucristomi catamècè 'aishmi asaribi upí 'inun ca Nucèn Papa Diosan ainan 'inun mitsu 'imi axa. Usa 'ain camina Nucèn Papa Diosan Bèru Ñunshin Upía mitsubè cupí bèsibè bèsibè nuibanani, bèsin sináncésaribi oquin sinani achúshisa 'ain. Usa 'ixun camina Jesucristo cupí ainan 'ixun Nucèn Papa Dios cuèèncésabi oquin ñu 'anan a rabianan unicama a ñucáxunti 'ain. <sup>6</sup>Nucèn Papa Diosan bana cuèèno ax ca èsai quia:

'Èn cana maxax upí nancèsa oquin uni achúshi, Sión cacè matá me

anua Jerusalén 'icè, anua 'inun 'imiti 'ain. Unían xubu 'anuxun maxax upí ami xubu raroti caiscè usaribi oquin 'èn caiscè ca ax 'icèn. Axa ami catamècè unicaman ca isti 'icèn, an ca asérabi ax quicésabi oquin atu 'aquinia quixun.

<sup>7</sup>Ami catamècè 'ixun camina mitsun anun cuèèncè ñu upí sináncésamaira oquin a sinánti 'ain. Mitsux usai 'icèbèbi ca axa ami catamècèma unicamax Nucèn Papa Diosan bana cuèèno èsai quicèsa 'icèn:

An maxax xubuacé unían bitancè xun a cuèènquinma racáncè 'aishbi ca a maxax béri amia xubu cushicè 'icèn, itá upímia xubu cushicè usaribiti.

<sup>8</sup>Imainun ca Nucèn Papa Diosan bana èsai quia:

A maxáxxmi ca uni raírínèx tatíqui chacátí 'icèn, a maxax chami chacati ca nipacèti 'icèn.

Maxax ñui quicè 'aishbi ca a bana Cristo ñui quicè 'icèn. An Jesusan bana cuaquinbi asérabi ami catamèquin aín bana quicésabi oquin 'acèma ax ca uni maxáxxmi tatíqui nipacècésaribi 'icèn. Ui unicamax cara usai 'iti 'icè quixun ca Nucèn Papa Diosan béráma 'unáncèxa.

#### **Nucèn Papa Diosnan unicama ñuicè bana**

<sup>9</sup>A unicama usa 'aínbi camina mitsux Nucèn Papa Diosan ainan 'inun caísa 'ain. Usa 'ixun camina ax cuèèncésabi oquin 'anan aín unicama a ñucáxunin. Camina an 'imicèx upí 'aish aín uni 'ain. Usa 'ixunmi a rabi quin an 'acè ñucama camabi uni ñuixunun ca Nucèn Papa Diosan mitsu ainan 'inun caísa cèxa. Mitsux béráma béanquibucènu nicèsa 'iá 'aishbi camina béri an 'imicèx xabánu nicèsa 'ain, axa mitsubè 'ain.

<sup>10</sup>Béráma Nucèn Papa Dios 'unáncèma

'iá 'aishbi camina mitsux bërí aín uni 'ain. An ca mitsu nuibaquin 'aquinti 'icë quixun 'unáncëma 'icëbia Nucën Papa Diosan nuibaquin mitsun 'uchacama tērénxuan 'aish camina ainan 'ain.

**Nucën Papa Dios cuëncësabi oi 'iti bana**

<sup>11</sup>Ën nuibacë xucéantu, cana mitsu cain, Nucën Papa Dios mitsun 'Apu 'ain ca aín nētēx mitsunanribi 'icën. Usa 'ain camina ënë menu 'aish unia aín menumabi 'icësaribi 'ain. Usa 'aish camina anbia 'atimaquin sináncë cupía 'atima ñu 'acë uníxa 'icësaribiti 'itima 'ain. Usa unix ca Nucën Papa Diosbë upí 'ima. <sup>12</sup>An Nucën Papa Diosan bana 'unáncëma unicaman isnun camina mitsux upitax bucuti 'ain. Usaími 'ia isi ca atux an ñu 'atima 'acë uni 'acësa oquin mitsu ñui 'atimati banacë 'aishbi mitsúnmi upí oquin ñu 'aia isá 'ixun anúan an camabi unin ñu 'acë isti nētēn Nucën Papa Dios rabiti 'icën.

<sup>13</sup>Nucën 'Ibu Jesucristomí sináncë 'ixun camina camaxunbi mitsun 'apucama ënë menua unin 'apu 'imicë, axa quicësabi oquin ñu 'ati 'ain. Amiira unicama cushicë 'apucëñunbi, <sup>14</sup>camina an anëcë aín unicaman banaribi tanti 'ain. Atux ca unían uisa ñu cara 'aia mëníonuan 'apun 'imicë 'icën. An 'amicëxun ca atun axa 'uchacë uni usaquin 'atëcënxunma 'anun castícania. Usaquin 'anan ca an ñu upí 'acë unicama a nuibaquin —mix camina upí 'ai —quixun caia. <sup>15</sup>Mitsúnmi upí ñuishi 'ati ca Nucën Papa Dios cuëñia. Usaquinmi 'aia isí ca an Nucën Papa Diosan bana 'unáncëma 'ixun an upí oquin sináncëma unicama ax mitsumi uisaíbi banatima 'icën.

<sup>16</sup>Mitsun upí ñuishi 'ai camina 'apucamami racuétima 'ain. Usa 'aishbi camina —'ëx cana camabi unin iscëx upí uni 'ai —quixun sinánquin amo cëmëanan ñu

'atima unéxun 'ati sinántima 'ain. An asérabi Nucën Papa Dios cuëncësabi oquinshi 'acë unisa camina 'iti 'ain.

<sup>17</sup>Camabi uni camina upí oti 'ain. Axa Jesucristomí catamëcë unicama camina nuibati 'ain. Nucën Papa Diosmi camina racuétí 'ain. Racuëanan camina mitsun 'apu quicësabi oquin ñu 'ati 'ain.

**Cristo tēmërasaribi oía aín unicamax tēmëрати bana**

<sup>18</sup>Uni ñu mēëxuncë 'ixun camina ami ñu mēëxuncë unían mi 'amicëxun 'aisama tanquinma a 'anúan mitsu cacë ñu a upí oquin 'axunti 'ain. Usaquin camina an mitsu nuibacë unishima, an mitsu nuibacëma uniribi upí oquin ñu 'axunti 'ain. <sup>19</sup>An ñu mēëxuncë unían upí oquin ñu mēëxuncëxunbia an ñu mēëmicë unin 'atimoquin tēmëramicë xunbi ca an uni ñu mēëxuncë unin —'ëx cana Nucën Papa Diosnan 'ai —quixun sinánquin tanshiti 'icën. Usaí 'iti ca Nucën Papa Diosan iscëx upí 'icën. <sup>20</sup>Usa 'aínbi ca upí oquin ñu mēëiama, an mitsu ñu mēëmicë unin mitsu 'atimoquin tēmëramicëxunmi tanshitiabi Nucën Papa Diosan mitsu upí isima, mitsun 'ucha cupía usoquin mitsu 'aia isquin. Isanan ca upí oquinmi ñu mēëxuncëxunbia an mitsu ñu mēëmicë unin 'atimoquin tēmëramicë xunmi tanshiti Nucën Papa Diosan mitsu upí isia. <sup>21</sup>Usaími 'inun ca Nucën Papa Diosan mitsu aín uni 'imiáxa. Cristonën ca ñu 'atima 'acëma 'ixunbi mitsu cupí tēmëracëxa. Usaribi oquin camina ñu atima 'acëma 'aish tēmëraqunbi tanshiti 'ain. <sup>22</sup>Cristonën ca uisa ñu 'atimabi 'ama 'icën. 'Anan ca uisaquinbi uni paránma 'icën. <sup>23</sup>Unían ami nishquin ñu cacëxunbi ca usaribi oquin cáma 'icën. Usa 'ixun ca unían 'atimoquin tēmëramicëxunbi uni —cana mi cupiti 'ai —quixun cáma 'icën. Cupiti

sinánquinma ca —'en Papa Diosan cuni ca upí oquin isquin mēnōti 'icē —quixun sináncēxa. <sup>24</sup>Nun 'uchacama cēñucē 'aishnu amiribishi ñu 'atima 'atēcēnima, ñu upíshi 'ai tsónun ca Cristo nun 'uchacama bicē cupí i curúsocēnu bamacēxa. Mitsúxmi ñu 'atima 'ai 'insíncēsa 'aishbi upí 'inun ca ax 'aisamaira oquin paē tēñēi bamacēxa. <sup>25</sup>Carneronēxa 'ibuñuma 'aish 'icēsari camina mitsux 'iacēn. Usa 'iá 'aishbi camina sinanati Cristomi catamēan. Amia catamēcēxuan aín 'ibun carnero bēruancēsa oquin ca an upími 'inun mitsu bēruánquin 'aquinia.

#### Usai uni aín xanubē 'iti bana

**3** <sup>1</sup>Xanucama, mitsuribi cana cain, min bēñéan cacēxun cuaquin 'atimaquin sinanima camina abē upí 'iti 'ain. Usaími mitsux 'icēbē ca min bēñē, Cristo ñi quicē bana cuaisama tancē 'aishbi, min cacēxmabi upitax 'ia isi sinanati 'icēn, <sup>2</sup>mixmi upí sinánñu 'aish abē upí 'ain. <sup>3</sup>Upíra upí 'iisa tanquin camina min bu 'aisamaira oquin mēñonan, curi ñun mēñocanan, chupa cupíra cupícé pañutima 'ain. <sup>4</sup>Usai 'ima camina mitsux upí sinánñu 'aish bētsibē nishananima upitishi banati 'ain. Usai 'ia isquin ca bētsin sinánti 'icēn —a xanux ca aín nuitu upí 'icē —quixun. Usai upí 'iti ax cuni ca uisa 'aishbi cēñutima. Usai 'imi mitsux upí 'icē isi ca Nucēn Papa Dios cuēñēia. <sup>5</sup>Usairibi ca an Nucēn Papa Dios cuēñcēsabi oquin 'aisa tancē xanucamaxribi 'iacēxa. Nucēn Papa Diosmi catamēanan aín bana cuaquin ca aín bēñē quicēsabi oquin 'acēxa. <sup>6</sup>Usaribi oquin ca Saran aín bēñē Abraham cuēñcēsabi oquin 'anan aín bēñē 'icēbi —'en 'ibu —cacēxa. Mitsúxribi ñu upíshi 'anan, Nucēn Papa Diosmi catamēti, uisa ñu cara 'icēbēbi racuécēma 'aish camina Sara 'iásaribi 'iti 'ain.

<sup>7</sup>Xanuñu unicamaribi cana ēsaquin cain, min xanubē camina upí oquin sinani nuibananti 'ain. Axa xanu 'aish cushima cupíshima, mix 'icēsaribitia ax Nucēn Papa Diosmi catamēcē cupí camina a nuibaquin 'aquinti 'ain, mitsúnmi usoquin 'aia isquian Nucēn Papa Diosan mitsúnmi a ñucacē bana upí oquin cuati cupí.

#### Jesucristomi catamēquin upí ñu 'acē cupía ax tēmēracē unicama

<sup>8</sup>Ēñē banaribi cana mitsu cain, axa Jesucristomi catamēcē uni raírinēn sináncēsaribi oquin sinani camina atubē nuibananti 'ain, atúxa mitsun xucēsaribi 'ain. Camina bētsibē camáxbi nuibanani 'aquianani rabítima 'ain. <sup>9</sup>An mitsu 'atimocē unicama camina cupiquin aribi 'atimotima 'ain. Axa mitsumi 'atimati banacē unimi camina mitsúxribi 'atimati banatima 'ain. Usai 'imi bētsibē nuibanani upitax buacunun ca Nucēn Papa Diosan ainan 'inun mitsu caíscacēxa. <sup>10</sup>Ēsaribi ca Nucēn Papa Diosan bana cuēñēo quia:

Ax upitax tsótisa tancē unix ca ñu 'aisama ñui banaima 'ianan cēmēi banatima 'icēn. <sup>11</sup>Ñu 'aisama 'ati ēnquin ca ñu upíshi 'ati 'icēn. Nishananíma ca unibē upíshi 'iti 'icēn. <sup>12</sup>Usai 'iquin ca 'unánti 'icēn, Nucēn 'Ibu Diosan ca an upí ñu 'acē unicama bēruánquin 'aquinquin aín bana cuaquin an ñucacēsabi oquin 'aquinia quixun. Usa 'ixunbi ca an ñu 'atima 'acē unicama an 'aquinima.

<sup>13</sup>Mitsúnmi upí ñu 'aia isía mitsu ñui uni mimi manáncēxbi ca cēmēi quicē 'iti 'icēn. <sup>14</sup>Mitsúnmi ñu upí 'acē cupí tēmēraibi camina Nucēn Papa Diosan 'aquincēx cuēñti 'ain. Mímia uni 'icēxbi camina racuēti masá nuitutima 'ain.

<sup>15</sup>Usai 'ima camina min nuitu mēu

—Cristo ca asérabi 'ën 'ibu 'icë —quixun sinani ami catamëti 'ain. Unin mitsu —uisa cupí caramina Jesucristomi catamëquin abë tsoti sinani —quixun ñucácëxun anun cati bana 'unáncë camina 'iti 'ain. Usa 'ixun camina cëruti rabíquinma upí oquinshi cati 'ain. <sup>16</sup>A sinani masá nuitunuxun ñu 'atima 'aíma camina chuámashi 'iti 'ain. Usámi mitsux Cristonën 'imicëx upitax 'ia isi ca an mitsu 'atimaquin ñuicë unicama —nuxnu quicë bana ax ca cëmë 'icë —quixun sinani rabínti 'icën. <sup>17</sup>Axa cuëncëbëa, Nucën Papa Diosan uni aín ñu upí 'acë, a cupí tëmëratí asábi 'aínbi ca an ñu 'atima 'acë cupía uni tëmëratí ax aín 'uchabi 'icën.

<sup>18</sup>Ax upí 'aíshbi ca Cristo camabi unin 'ucha cupí achúshitishi bamacëxa, unicama ami catamëti Nucën Papa Diosnan 'inun. Uni 'aish bamatancëxbi aín namibë aín bëru ñunshin 'itëcëni baísquiax ca bëtsi 'iacëxa. <sup>19</sup>Cristo bamatancëx baísquicëma pain 'ixun ca anua bama unicaman bëru ñunshin sipuacësa 'icë, anu cuanxun bana ñuixuancëxa. <sup>20</sup>Bamacëma pain 'ixun ca a unicaman Nucën Papa Dios cuëncë sabi oquin 'aisama tancëxa. Noénëan aín manë nunti 'amainun ca unicama aín ñu 'atima 'acëcama ënun quixun Nucën Papa Diosan caíancëxa. Caíncëxunbia aín ñu 'atima 'acë ëncëma 'icëa aín patsan bacan cëñumainun ca 'itsamashi ocho uníxëshi manë nunti mëu atsini iéacëxa. <sup>21</sup>Nucën Papa Diosan sinánmicëxa Noé manë nuntinu 'iruax iéasa, usaribítí cananuna nuxribí Nucën Papa Diosmi catamëti 'unpaxan nashimicë 'aish iëtin. Nun namia chuañuma 'inun cananuna nashimicë 'itima 'ain. Usai 'íma cananuna —Jesucristo baísquia cupía Nucën Papa Diosan nu upí 'imicë 'aish cananuna nun 'uchacama tërénce 'aish an iscëx upí 'ai —quixun sinani

nashimicë 'ain. <sup>22</sup>Baísquitancëx naínu cuan 'aish ca Jesucristo ax Nucën Papa Diosbë 'Apu 'aish aín mëqueu 'icën. Usa 'icë ca ángelcama 'imainun uisa cushi cara anribi aín bana cuatia.

#### Nucën Papa Diosan a 'anun nu 'imicësabi oquin ñu upí oquin 'ati

**4** <sup>1</sup>Uni 'ixun ca Cristonën tëmëraquin paë tancëxa. Usa 'ain camina 'unánti 'ain, mitsúnribi camina —sapi cana tëmëraquin paë tanti 'ai —quixun sinánti 'ain. Uin cara Jesucristonan cupí tëmëraquin paë tanxa an ca ñu 'atima 'ai 'uchati éanxa. <sup>2</sup>Usa 'ixun ca axa Jesucristomi sináncëma unin sináncësa oquin sinanima Nucën Papa Dios cuëncësa oishi 'ia, anúan bamati nëtëa 'itámainun. <sup>3</sup>Béráma camina axa Nucën Papa Diosmi sináncëma unicaman 'acësaribi oquin ñunshínquin ñu 'atima 'anan paéanan, paénxun pi sharánan Nucën Papa Dios rabiquinma unían ambi sinánxun 'acë ñuishi rabiácën. Usaquin 'aquinbi camina a ñucama éancën. <sup>4</sup>Usai 'iquinmi atubëtan ñu 'atëcëniama oquin ca unin —uisa cupí cara nubë niquinbi nu éanxa —quixun sinánquin mitsu 'atimaquin ñuia. <sup>5</sup>Mitsu ñuiabi ca ax utëcënquin Cristonën a unicama 'imainun camabi uniribi, axa bamacë macama 'imainun bamacëcamaribi —uisa carana ënë unicama oti 'ai —quixun isti 'icën, an 'acë ñucama 'unánquin. <sup>6</sup>Usai ca 'iti 'icë quixuan 'unánun ca bamacëma pain 'ixuan unicaman cuanun aín unicaman Cristo ñui quicë bana ñuixunia. A bana cuati Jesucristomi catamëcë 'aish ca aín unicama, camabi uni 'icësaribiti bamati 'aíshbi, Nucën Papa Dios 'icësaribiti nëtétimoi tsóti 'icën.

<sup>7</sup>Anúan ënë menu 'icë ñucama cëñúti nëtë ca 'uramatia. Usa 'ain camina camabi nëtën upí oquin sinani Nucën

Papa Diosbë banati 'ain. <sup>8</sup>Ianan camina mitsux asérabi nishanani nuibanani upitax bucuti 'ain. Bëtsi uni nuibacë 'ixun ca unin a unin 'uchacama ñuiquinma manuia. <sup>9</sup>Mín xubunua aia camina bëtsi uni biisama tani bëtsi sinánquinma upí oquinshi biti 'ain. <sup>10</sup>Mitsúnmi raíri uni 'aquinun ca Nucën Papa Diosan uisa ñu caramina 'ati 'ai quixun mitsu 'imia. Usa 'ain camina Nucën Papa Diosan mitsu achúshi achúshi bëtsi bëtsi ñu mëëti 'anun 'imicë 'ixun mitsun ñu mëëti upí oquin 'ati 'ain. <sup>11</sup>Uix cara banati 'icë, ax ca Nucën Papa Diosan sinánmicësabi oi banati 'icën. Uin cara raíri uni ñu 'axunia an ca Nucën Papa Diosan cushiocëxun upí oquin 'ati 'icën. Usoquin camina Jesucristonan 'ixun, añu ñu caramina 'ai a Nucën Papa Diosan cuëëntanun 'ati 'ain. Ax 'Apuira 'aish cushiira 'icë ca camabi unin rabiti 'icën, nëtë xëñibua 'aínbi. Usaquin ca 'ati 'icën.

#### Jesucristonan 'aish tëmëratí

<sup>12</sup>Ën nuibacë xucéantu, mitsúnmi asérabi caramina Jesucristomi catamëti quixun 'unánuan bëtsi bëtsi ñu 'icëbë tëmëraíbi camina ratuti —uisa cupí carana ësai 'i —qui ax bënë'tima 'ain. Camina sinánti 'ain, axa Jesucristomi catamëcë unicamax ca usari 'ia quixun. <sup>13</sup>Bënë'quinma camina sinánti 'ain, ami nishquian unin bëtsi bëtsi océxa Cristo tëmërasaríbi oquin cananuna nunribi tëmëraí quixun. Usaquin sinani camina tëmëraíbi cuëënti 'ain, usaríbiti 'Apuira 'aísha Cristo aia isi cuëënu. <sup>14</sup>Cristonan cupía unin mitsumi nishquin 'atimaquin ñuicëxbi camina Nucën Papa Diosan Bëru Ñunshin Upí cushiira, axa mitsubë 'ain, cuëënti 'ain. Unían 'atimaquin ñuiabi camina mitsun Cristo rabin. <sup>15</sup>Mitsua Jesucristonan cupí unin bëtsi bëtsi ocëx camina a sinani rabíntima

'ain. Usa 'aíshbi camina uni 'acë cupí 'ianan ñu mëcamacë cupí 'ianan ñu 'atima 'acë cupí 'ianan ñuianancë cupími tëmëracë a sinani rabínti 'ain. <sup>16</sup>Usaquin ñu 'acëma 'aíshbi Cristonan 'icë cupía unin tëmëramicëxbi camina rabíntima 'ain. Rabínquinma camina Nucën Papa Dios rabiti 'ain, mitsúxmi asérabi ainan cupí.

<sup>17</sup>An aín bana 'acë unibi ca Nucën Papa Diosan uisai cara 'ia quixun isia. Usa 'ixun ca an aín bana cuacëma unicama aira atun ñu 'atima 'acë isquin uisaira cara oti 'icë usoquin 'ati 'icën. <sup>18</sup>¿Atux aín ñu 'atima 'acë ënquin ñu upí 'acë 'aíshbia, aín unicama iétima 'aíshbi iécë 'ain, cara ax ami catamëcëma 'uchañu unicama uisairai 'iti 'ic? <sup>19</sup>Usa 'ain camina tëmëraíbi —Nucën Papa Dios cuëëncëbë cana ësai 'i —quixun sinánquin mitsun 'acësabi oquin upí ñuishi 'anan Nucën Papa Dios, an mitsu unio, an bërúanan ami catamëti 'ain, an ca aín quicësabi oquin 'ë bërúanti 'icë quixun 'unani.

#### Axa Jesucristomi catamëcë unicama 'ësëti bana

**5** <sup>1</sup>Axa Jesucristomi catamëcë unin cushicamasaríbi cana 'ëx 'ain. Usa 'ixun cana atúan 'acësaríbi oquin Cristo camabi unin 'ucha cupía tëmëra, a ñuiquin bana ñuixunin. 'Anan cana atúxa 'icësaríbiti Cristo utëcëncëbë aín nëtënu abë 'iti sinanin. Usa 'ixun cana axa Jesucristomi catamëcë unin cushicama mitsu ësáquin cain: <sup>2</sup>Atun cushicama 'ixun camina Nucën Papa Diosan unicama bana ñuixunquin, atúxa upí nuituñu 'aish chuámarua bucunun 'aquinti 'ain. An carnero bërúancë unin aín carnero 'acësaríbi oquin camina a unicama upía 'inun bërúanti 'ain. Usoquinmi 'anúan mitsu unin caíscë cupíshima camina asérabi 'aisa tanquin

'ati 'ain. 'Anan camina curíqui biti sinánxuinshima minbi asérabi 'aquinsa tanquin 'ati 'ain. <sup>3</sup>'Apúxa unían ax quicësa oquinshi 'anun quiax quicësari-biti camina banatima 'ain. Usari 'íma camina mitsúnmi bana ñuixuncë unicomaxa usaribiti 'inun, upíshi 'iti 'ain. <sup>4</sup>Usoquin 'aia ca Jesucristo, unin 'acësamaira oquian an aín unicama bërúancë, an utëcënquin mitsu —asábi ca —quixun catancëxun aín nëtënuaxmi xëñibua 'aínbi abë cuëñun mitsu 'imiti 'icën. Ënë nëtënuax cuaiquin canania uisa ñu cara 'inancëxun bitsia uni cuëncëbëbi ca an bicë ñu chëquia. Usaía uni 'icë 'aínbi camina mitsux xëñibua 'aínbi Nucën Papa Diosbë 'aish cuëñti 'ain.

<sup>5</sup>Usaribi oquin cana bëná unicama ësaquin cain, mitsun cushicaman bana camina timaquinma cuati 'ain:

Nucën Papa Dios ca unia rabíti cuëñima. Usa 'ixunbi ca axa rabíçëma unicama nuibaquin 'aquinia.

Usa 'ain camina —'ëx cana bëtsi unisamaira 'ai —quixun sinanima camáxbi bëtsin sinancësaribi oquin sinani upiti 'ësëananti 'ain. <sup>6</sup>Usa 'ain camina aín bana timaima uisa ñu cara 'icëbëbi bënëtima Nucën Papa Dios 'Apúira ami catamëti 'ain. Usaími 'ia ca an anúan 'ati nëtë ucëbëtan uisai cara 'iquin tëmëracë 'aishbimi usai 'icëmasa 'ianan asábiira 'inun mitsu 'imiti 'icën. <sup>7</sup>Uisaquin sinani caramina masá nuituti, añu ñu sinani caramina racuëti, a ñuiquin camina Nucën Papa Dios cati 'ain, an ca mitsu nuibaquin bërúanquin 'aquinia quixun 'unánquin.

<sup>8</sup>Paru 'inúan cuëéruí aín piti bari nicësa, usaribiti ca ñunshin 'atimanën 'apu, uni ñu 'atima 'anun quixun sinánmianan Nucën Papa Diosmi sinánti ënminuxun bari nitsia. Usa 'ain camina

mitsua paránti rabanan bërúancati 'ain. <sup>9</sup>Usa 'ixun camina ñunshin 'atimanën 'apúan ñu 'atima 'amitisa tancëxunbi Jesucristomi catamëquin usa ñu 'atima 'ain. Camina 'unánti 'ain, mitsu 'acësaribi oquin ca ñunshin 'atimanën 'apun, camabi menu 'icë axa Jesucristomi catamëcë unicama tania quixun. <sup>10</sup>Usabi 'inúxmabimi tëmëracë ca Nucën Papa Diosan mitsu cushioquin Jesucristosaribi upí 'inun mitsu 'imianan —aín bana quicësabi oi cana asérabi 'iti 'ai —quixun 'unani ami cushinun mitsu 'imiti 'icën. Ax ca an mitsu nuibaquin 'aquincë 'ianan Jesucristonan cupí abëmi xëñibua 'aínbi upitax 'inun caíscë a 'icën. <sup>11</sup>Camabi unin ca Nucën Papa Dios rabiti 'icën, nëtë xëñibua 'aínbi. Cëñútimoi ca axira cushiira 'Apu 'ia. Usai ca 'ia.

#### **Bërúanxa 'inúan Pedronën Jesucristomi catamëcë unicama ca**

<sup>12</sup>Nucën xucën Silvano, ax ca 'ën iscëx upiti Jesucristomi sinancë 'icën. Usa 'ain cana an mitsu buánxunun ënë quirica mitsu 'axuan. Ënë quiricanu 'ësëanan cana mitsu cain, an mitsu upí oquin cushionan 'aquincë cupí camina asérabi 'unánti 'ain, uisaira oquin cara Nucën Papa Diosan mitsu nuibatia quixun. A ënima camina miximi 'icësabi oi ami upiti catamëti 'ain.

<sup>13</sup>Babilonianu 'icë axa Jesucristomi catamëcë unicama, mitsu 'acësaribi oquian Nucën Papa Diosan ainan 'inun caíscë, acaman ca bërúanxmi 'icanun 'ën mitsu canun 'ë caxa. Marcos, 'ën bëhçicësa, anribi ca bërúanxmi 'inun 'ën mi canun 'ë caxa.

<sup>14</sup>Jesucristo cupí micamaxbi xucënsa 'aish camina nuibanani bërúanx 'inun bëtsibë bëtsibë cananti 'ain.

Uicamax cara Jesucristonan 'icë ax chuámarua bucucanti cana cuëñin. Ashi, Pedro.